



Inatsisartunut ilaasortaq Suka K. Frederiksen, Siumut  
Inatsisartut Allattoqarfiat  
/Maani

**Namminersorlutik Oqartussanit pigineqartuni ingerlatseqatigiiffinni kalaallisut oqaatsivut nukittorsarneqarnissaannik § 37 apeqqut nr. 158-imut akissuteqaat.**

01-07-2015  
Suliap normua. 2015-3167  
All. nr. 585658

Asasara Suka Frederiksen,

Inatsisartut suleriaasianni § 37 naapertorlugu Naalakkersuisunut apeqquteqarsimavutit Namminersorlutik Oqartussanit pigineqartuni ingerlatseqatigiiffinni kalaallisut oqaatsivut il.il. nukittorsarneqarnissaat pillugit. Apeqqutit uannut akineqartussanngortinneqarsimapput.

Postboks 1015  
3900 Nuuk  
Oqarasuaat (+299) 34 50 00  
Fax (+299) 32 50 02  
E-mail: govsec@nanoq.gl  
www.naalakkersuisut.gl

Apeqqutigineqartunut akissutikka ataani tulleriaarlutik allassimapput.

**1. Naalakkersuinikkut Kalaallisut oqaatsivut atorlugit pisortat pigisaanni ingerlatsinikkut nukittorsaanissamik pilersaaruteqartoqarpa? Taamaattoqanngippat, sooq? Taamaattoqarpat, qanoq?**

**Akissut:**

Aallarniutigalugu erseqqissaatigissavara, namminersorlutik oqartussanit aktieselskabini pigineqartuni pissutsit aktieselskabit pillugit inatsimmi aalajangersakkat naatsorsuutigisallu naapertorlugit Naalakkersuisunit allaffissornikkut ingerlatsivigineqarmata. Tassunga ilanngullugu immikkut ittumik oqartussaaffinnik agguataarisoqartarpoq ingerlatseqatigiiffiit ataasiakkaat ataatsimeersuarnerisa (Naalakkersuisut), siulersuisut aamma aqutsisut akornanni.

Ingerlatseqatigiiffiit ulluinnarni ingerlanneqarnerat pillugu aalajangiinnaanermut aalajangiinissamut piginnaatitaaffik pingaarnerusutut periutsitut ataatsimeersuarnerup avataaniippoq. Taamaattumik Naalakkersuisunit pingaartinneqarpoq aktieselskabinut attuumassuteqarnerup ingerlateqqinneqarnissaa, tassani ingerlatseqatigiiffiit kiffaanngissuseqarnerat ataqqillugu aammalu siulersuisunit aqutsisunillu oqartussaaffimmut akisussaaffimmullu tunngatillugit "ingalassimaartitsinissamik periuseq" tunngavigalugu.

Taamaattumik pineqartumi Naalakkersuisut politikikkut anguniagaat pissutsinut atuuttunut naapertuuttunngorsarneqarsimavoq.

Politikikkut naalakkersuisooqatigiinnissamut isumaqatigiissummi ilaatigut Naalakkersuisunit isumaqatigiissutigineqarsimavoq, pingaartuusoq qulakkiissallugu ingerlatseqatigiiffiit pisortanit pigineqartut sulisoqarnermut politikkeqarnissaat. Sulisoqarnermut politikki suliffimmut amerlasoorpassuarnik atuuffeqarpoq. Taassuma ingerlatseqatigiiffiit aaqqissuussaanagerat eqaatsuutippaa, sulisut iluarusuttuutittarlugit aamma sulisunik eqqortunik piginnaasalinnik ineriartornissamut periarfissiisarluni, taamaasilluni suliassat sapinngisamik pimoorusaanerpaamik pitsaanerpaamillu suliarineqartalersillugit.

Namminersorlutik oqartussanit pigineqarlutik ingerlatseqatigiiffinnut Naalakkersuisut attuumassuteqarnerminnut tunngaviit allaaserineqarsimasut tunngavigalugit isumaqarpunga, uagut ingerlatseqatigiiffiutivut ingerlatseqatigiiffiit allat assigalugit Inatsisartut inatsisaanni aalajangersakkat anguniakkallu eqquutsittassagaat kalaallisut oqaatsitta atornerarnerat pillugu, taakku Kalaallit Nunaanni pisortatigoortumik oqaasiusut, tamannalu isiginiartassallugu ingerlatseqatigiiffiit sulisoqarnermut politikkiannit ilusilersuinermi.

**2. Pisortat pigisaanni qaffasissunik atorfiit nunaqavissunik taarseriartuaarneqarnissaannut naalakkersuinikkut iliuuseqarnissamik pilersaarusiortoqarpa? Assersuutigalugu Atorfinitsitseriaatsit nutaat atortilernerisigut?**

**Akissut:**

Soorlu apeqqut 1-imut akissutinni oqaatigigiga Naalakkersuisut ingerlatseqatigiiffinnut ataasiakkaanut atassuteqarnerat aaqquissuunneqartarpoq "ingalassimaartitsinissamik periuseq" aallaavigalugu. Ingerlatseqatigiiffinni ataasiakkaani atorfiit inuttalerneqartarnerinut aalajangersimasumik tunngatillugu inatsisiliorneq naapertorlugu tamanna ingerlatseqatigiiffiit ataasiakkaat siulersuisuisa aqutsisuisalu nammineerlutik isumagisarisaartussaavaat. Naalakkersuisunit tamatuma allanngortinneqarnissaa pilersaarutigineqanngilaq.

Pineqartumilu tassani aamma ingerlatseqatigiiffiit ataasiakkaat sulisoqarnermut politikkeqartariaqarput sulisussarsiornermut aamma sulisunik piginniinnarsinnaanermut kiisalu atorfillit ineriartorsinnaanissamut periarfissaqartittassallugit.

**3. Pisortat pigisaanni, namminersorlutik oqartussani, kommuninilu, kisitsisaatigineqarpa atorfiit qanoq nunavissunut, avataaneersunullu agguartaarneqarnersut? (Takussutissiaq tassani takutinneqarput nunaqavissunut avataaneersunullu sulisut atorfinnut agguataarlugit aamma sulerisussanngorlugit sumut atorfinitsinneqarsimanersut).**

**Akissut:**

Naamik. Naatsorsueqqissaartarfik suliffissarsiortunik naatsorsueqqissaartarnermut atatillugu naatsorsueqqissaarnikkut katersanik takussutissianik saqqummersitsisarpoq, tassuuna takutinneqartarlutik najugaqavissut pingaarnerusutigut sulerisuuneri piffissamut, suliffimmut, suaassutsimut, qassinik ukioqarnermut, najukkamut sumilu inunngorfimmut agguataarlugit. Sumi inunngorfimmi nalunaarneqartarpoq inuk Kalaallit Nunaanni avataaniluunniit inunngorsimanersoq.

Inussiarnersumik inuulluaqqusillunga



Kim Kielsen